

---

## CHADAMBE ARO A-GILSAK(YOUTH AND THE WORLD)

- Mr. Senarth C. Marak(Jachongpa)  
Pastor - Masangpani Baptist Church

Talatchengani:

Chadambe ine agangenchimode gisikni aro be-enni gita namen dambemiting mikkang bimang silmiting, bilni gita bilakmitingni somoi ong'a. Ian bilsi 12 oni 30 ona ong-gipa manderangko chadambe ine aganna mn'gen, indiba iako biap aro a-songni kri dingtang dingtang gadang dake donanirangba gnang jekai African Youth Charter- bilsi 15-35, Indian National Youth Policy-ni gita bilsi 13-35, ABDK BYF handbook-ni gita-bilsi 12-30. Chadambeni somoiko ga-dapahaon (adolecesslant-ni stage 12-17) mandeo dingtang dingtang chanchianirang gisikona sokbaa. Be-en bimangni gita develope ong-rorobae salbatbatna dingtangrorobaa arobe-enni skanirangba batrorobaa. Chadambeni somoio gisiko keningani, jajrengningani ba kengokani, chanchisokgijani ba chanchina changijani, ka'o nangningani, kratcha-ningani, kema ka-na man-gijani, sakgipinna bamna sikkijani, pekgipa ringa cha-anirangko jakdangdikna skani (biri, cigarate, chu, tamaku, ganja, bang, Bandar sada chaani etc) an-sengna skani,saksa sakgipina ka-sana (mikchana) skani gisikrang sokbaa. Uamang (chadamberang)pangnan kusini, katchaani, gisiko aro be-eni skaniko chu-sokatna skani aro sakgipinni mitelako man-na sikkiparansan ong'a mikangchini giminde bang'e chanchisoni dongbreja.

Chadambemitingon name mikangchina tarisamsuani somoiba ong'a *ia namjabegipa a-gilsako chadambemitingon mikang jangi tanganina tarisojaode gongenaba donga ba duko sripe janggi tangna nangnaba donga*.Dambeni salara ringsong gital bolrang gita, soksol gital bijak aro monchokgipa bibalrang baksa apsanaia.Kiro sikna on-jaode, bijakkon jakdalna on-jaode aro bibalkon balgaoatjaode gamchatanin dongjawa ong-siani aro nidikanisan ong-aigen.

### 1. Modern Life Style (Gital chasongni janggi tangani):

Gital chasongni janggi tanganiko namedake talatnade namen apaldugaa indiba adita ong-enga obostarangko niate anga iano chanchirimna namnikbeenga.An-tangko mingsingatani, Brand-ni bosturangko gana chinani ba jakalani, Partyrango bak ra'ani, Songre songabatani, Dam rakgipa (expensive)Cell Phone ba bosturangko jakalani, Presentationrangba LCD Projector-o project ka'ani, Facebook, Whats App, Twitter, E-Mail, Digital World,Cash less Society, Tattoo ka'ani, Ring-rangko ganna nangijagipa be-enrango ganani, Mingsingipa manderangni janggi tangani gita tangpaani ba ja-rikani.Mikangchini janggi tanganiko ma-siani ma-sisoani (fortune telling), montol dakani (black magic), Gisikko okame niani (spirit guides), etc.News paper ge-antion Niksamsuanirang ingipa collum gnang (horoscope),Gisiko chanchie gipin (planet) biapona sokani, Yoga, Satanko olakiani, Drugs jakalani, Til-ek an-chaani iarangan iarangan ia chasongni janggi tangani ong-enga.

### 2. Modern Idols (Chasong gitalni Bimang Dakani):

Bimang dakani ine aganengon je bimangba ong-na amaia jekon na'a nangni janggi tanganio skangipa dake ra'a ba olakia. An-ching Isolkosa Olakigipa aro skangipa dake an-chingni janggi tanganio dona nangiparang ong'a.Uni palo na'a jeko donskaaunan nangni bimang dakani ong'aia. Jean nangni ka-tongo dongaaro ua gride janggi tangna man-jawa.Chong-motan ia a-gilsako jenan na'a ka-sabata. Iarang haidanangni Gitalgipa gari, Sports, Politics, Money and Power, Occupation, Mingsingipa mande, Drugs, Chu, Fashion, Boyfriend or Girlfriend, Til-ek an-chaani etc. Bimang dakani ianon bon-aija ian dingtang dingtang gipinrangkoba man-gopa jekai mite olakiani, ga-sugipa manderangni mikango tugopani, Satanism etc.

#### i. An-tangko Gitel dakani:

Bang'a manderang ia chasongo an-tangko Gitel dakna chanchitokenga, an-tangko Isol ine agananirang donga jekai Bray Wayatt (wrestler) an-tangko **I am The God** ine agana indaken gipinrang, An-tangtangko Jisu ine agangiparang bang-beaha, Hindu toromranggo an-tangko one of the Avatar of their god ine claim ka-giparang bang-beaha. An-tangni photoko pakmarango sitee olakiani ia chasongo bang-rorobaengaha, aro indaken mitam manderang an-tangtangni be-en bimangrangkon olakitokengaha. Uni a-selan Hajalni hajal tangkarangko galan baksa bang'a kontani konta somoirangko Beauty Parlour, Gym,Yoga, Jogging-ore-atokenga jedakodean-tantangni be-en bimangrangko nitoe rakina man-gen. Indiba Isolni kattaba *Sastroko dam rakbataniko breaha ine agananikode knarongbreja dam nombatako sanditoka aro man-ode indin sualgipakosa man-a jotton ka-toka*. Unbaksana Isolni kattako poraiean-tangko

tarinade gisik nangtokja aro Isolo bi-naba somoiko raja. Sal rakoba mika waoba an-tangtangni be-en bimangko nitoe tarinade mamung dakeba somoiko galja indiba Robibar Salo mikka waode Giljarangchi re-angan re-angja Isolko an-anina bate an-tangko tarianikon skangipa dake ra-tokenga, iarangan an-tangko gitel dakani ong-a. Isolni kattao agana *“Maina be-enniranta ka-ani man-gni ontisana ong-a; indiba olakianini man-gni pilakna ong-a, maina da-oni aro ong-gnini jangiko ku-rachaka uo gnang”* (1 Timothy 4:8). Da-ororoni chadamberang Jisu Kristoni ka-saani aro Uni kattarangko golpoana bate da-ororo ga-sugipa Company-ni bosturangkosa golpotokenga jekai *Patanjali, Amway, Modi Care, Vestige, Oliflame etc.* da-oni chadamberangni concernara angni mikangni gangmako maikai namatgen, gisim gisim dakrangko maikai rongtalatgen iarangkon dal-batgipa issue gita ra-tokenga. Anga iarangko nangja indakede aganjaenga an-tangtangko rongtale aro nitoe rakina an-chingni daito ong-a. Indiba iarangko Isolni dedrangna krae dakode nama maina an-ching Isolni torom nokdring ong-a, *“Aro mite dakanirang baksa Isolni torom nokdringni nangrima mai? Maina Tangipa Isolni torom nokdring an-chinga ong-a; indake Isol aganaha, Anga uamango donggen, aro uamango re-ruragen; aro anga uamangni Isol ong-gen, aro uamang angni manderang ong-gen* (2 Korinth 6:161; Korinth 3:16-17). Pilak tarianirang Isolni namnikani gita ong-na nanga Isol maiko namnikenchim uko uie an-tangni namnikamangmang ong-aigija Islni namnika baksa tarigiparang ong-na nanga *“Uamangni tariani, a-palni tariani, kni sakani aro sonanirangko ganani, aro ba-rarangko ganani ong-jachina. Indiba ka-tongni donnua mande, Isolni mikango gamchatbegipa, sontol aro tom-tomgipa gisikni sogijani tarianio ong-china* (1 Pitor 3:3-4).

## ii. Idol of Money and Power (Gam aro Bilko Gitel dakani):

Ia chasong gitalo pilakan tangkana daritokenga, pilakan man-e cha-na siktokenga. Tangka dongahaode pilakkon dakna ama ine chanchitokenga, beanbebe Tangka bang-ahaode manderangba mande ra-a, nambata sana bananikoba daknaba man-a, nama school aro College rango poraina man-a. Kamrangkoba brena amaia, tangka ong-ahaode pilkan ong-aia, mingsa aganani gnang *Tangka Kusiko Brena ama bang-a manderang ian ong-a ine ra-chaka, ian a-gilsakni re-ani ine bebe ra-tokenga. Tangka mandena bil, rasong aro mande ra-aniko ia a-gilsako on-a.*

Tangka ong-ahaode na-a jeko ska ukon man-aia aro uni giminan je cholchiba tangkako man-a ine namgija kamrangko ka-aniona sokangtokenga, jekaimande so-otani, rim-srukani, badingani, cha-uani, dacoit dakani, ra-srekdraani, be-entangko palani, drae kamrangko ka-atani etc. Iarang pilakan an-tango dongako chu-ongnikjaegamaro bilko gitel dakani aro uko man-a dariani a-sel ong-tokenga. Isol jangi tanganina chu-onga gita on-engama on-jaenga? Uako niatnan jamangtokenga *“Indiba gam gnangiparang ong-na sikkiparang nisia aro gimaao manderangko dubiatgipa dakmajoo aro jontio aro bang-a uigija aro cham-atani skarango ga-akgen. Maina tangkana ka-saa pilak namgijani ja-dil ong-a; uko mitam man-na ske bebe ra-aoni brangaha, aro an-tangtangko bang-en jajrengachi su-pruaha.”* (1 Tim 6:9-10). Uni gimin dugaanio namgijani gnang ine ma-sie ra-ode nambea.

## iii. Idol of Procession (An-tangko ga-sunikatani/mingsingatani):

Manderangni mikango an-tangko ga-sunikatani, mingsingatani, namnikatna skani ian ia chasongni manderangni skani ong-batenga. Ian nangni dam rakbegipa Gariko breani ba dingtangtegipa brand ba model ong-achi, Nitogipa Nok, A-a chi, Fisheries/Swimming Pool, sonani gananirang, Ganding chindingrang, Asongchakani chokirang etc. Iarangchi an-tangko mingsingatna jotton ka-anirang ia somoio ong-enga.

An-tangko ong-atgipa aro una patiengipa Isolko mingsingatani pal, an-tango je donga uachi a-gilsakna mingsingatna ia chasongo jotton ka-tokenga, uni a-selan manderangko namnikatna ine namgija kamrangkoba ka-tokenga. Indiba Jisude iarang pilakko wate an-tangko ja-rikchina aro uni kattako gipatanikosa nangnika (Mati 19:16-22).

## iv. Idol of World Leaders (Dilgiparangko bimang dakani):

Da-o chasong gitalo bimang dake olakiengiparangara Mingsingipa A-songko dilgiparang ong-a, India a-songo da-o isol dake manderangni olakiengipara Prime Minister Narendra Modi aro UP ni chief Minister Yogi uamang sakgni ong-enga. Uamangko isol gita chacha badiaba biaprangode uamangni photorangko olakianirangko dakengaha, una agre Wrestlerangko, Sports personrangko (*Sachin Tendulkar-ko Isol ine agana*), Film actor, Singers, uamangni photoko olakiani aro uamangni noksa gnangipa cholarangko ganani. Isarelrangni Egypt a-songoni re-ongkatbamiting somoioba Mosesa uamangni Idol ong-aha uni giminsa Mosejensalo A-brichina doanga uamangni mikkango Idol dongjaani gimin Sonani Matchu bi-sako Idol (bimang) dakaha.

Gisik ra·bo a·gilsako jegitaba mingsingbo uamangba nangita aro angita dakgipa ramram manderangan ong·a. Manderangsa uamangko an·tangni Idol (bimang) daktokenga aro dingtangteatenga. Mande tangenon jegitabaia a·gilsako mingsingbo sijokode uni mingsingani bon·aia/gimaai. An·chingni nisan done ja·rikna nangengipade Gitel Jisu Kristosa mande ong·ja Isolkosa.

**v. Idol of Sports (Kal·aniko bimang dakani):**

Chadambe manderang kal·na namen namnikgiparang ong·a indaken kal·anina pagol ong·tokbea. Jekai Cricket, Football, Volleyball, Carom, Badminton etc. Kal·ani manderangna kusini, katchaani, be·enni namgniko ra·baan baksa bang·a tangka paisarangko man·ani chol gitaba ong·a. Kal·aniko kal·giparang (professional) bilsio bang·a tangka paisarangko man·enga. Kal·ani manderangko gisikni aro be·enni gita susaaniko ong·ata, uamangni chanchianiko mingsan dakata, uan je cholchiba opponent·ko amani/cheani ong·a. Vince Lombardagana *Cheani pilakon man·aha ong·ja ian chonbeako man·anisan ong·aia*. Football kal·anio mitamrangde mandeskako nosto ka·na miksonganirangba dongaia. Wrestlerrang mandeskako matburingrang gita doka ian manderangko entertainment mangmangkosan on·aia janggi tanganina dakchakani ba namgniko on·ja. Chadamberang iarangko an·tangtangni Idol dake ra·tokenga, salgimik walgimik nianiko dakenga ba kal·enga, poraia gri, Isolo bi·ani gri, cha·a ringa gri kal·tokenga.

Christian chadamberang kal·aniko kal·na nangja ine angni aganani miksongani ong·ja, anga Cricket aro Footbalko nina aro kal·na namnika, indiba iako an·tangni Idol (bimang/gitel) dakanisa namja ba ukosa anga namnikja. Bang·a manderang dam rakani Sports Shoe aro material·ko brena namnika indiba Isolnade on·a sikja. Kal·aniko kal·na somoirangko ra·a indiba Sastro poraina aro Isolo bi·na somoirangko ra·ja, iarang Isolni namnikani ong·ja.

**vi. Idol of Lovers (Ka·satangko bimang/gitel dakani):**

Da·ororoni chadamberang ka·satang mikchatangko pilakna bate idol/gitel dak·tokenga. Ka·saengipa pante me·trana pilakna bateba chanchitokbatenga. Me·chikrang ua panteko bano nikchengaha, uni changroani, chanangani, chola ba·ra ganani etc. Apsandake me·asarangba basako ua me·chiko nikchengaha, maidakgipa cholako ganachim, maidakgipa Lipsticko nongachim, basako nangchiko niatachim. Ia indakarangkosa chanchiattaitaienga cha·oba ringoba ukosan nikataienga. Ka·saengipa me·a ba me·chik Idol (bimang/gitel) ong·na namen altuabea na·a simsakjaode.

Delilah Samson·ni Idol (bimang/gitel) ong·aha pilak somoirangkon unasa on·aiaha. Uandaken Isolko Olakiani, Isolo bi·ani aro Isol baksa nangrimani dongjaha bon·chotao an·tangni jangiko gimaataona sokataha (Bichal ka·gipa 13-16).

Ia chasong gitalo manderang maikoba bimang dake olakina, sakoba ja·rikna gisiko skani aro singsingatanian gapenga. Na·a chanchinaba gnang angade Christian uni gimin jeo ska unon dontongna man·aigen, Ru·uta bilsirangonin Isol baksa ong·enga uni gimin angade control·o ong·enga ine chanchinaba donga ka·sara chadambe Idol (bimang dakani/gitel)ni bilko namrenge ra·nabe. Na·a badita Isolni kattako aganprakna ama, Sastroko badita memory ka·a, Isolo badita chang bi·ronga mamungba ong·ja Isol nang·ni ka·tongo dongjaode pap mandeko ka·sine ka·sine salanga aro bon·chotao Isoloni chel·ata. Demas Isolni katako aganprakgipa ong·achim ua a·gilsaknirangko bimang/gitel dakaha aro Isolo bebe ra·ako watgalaha “ *maina Demas da·oni chasongna ka·saenba angko watgalaha, aro Thessalonikaona re·angaha* ” (2 Tim 4:10). Jisuni an·tang sningipa ong·na seokako man·gipa mande Judas Iscariot jean Jisu baksa re·gipa, dongpagipa, cha·rim ringrimgipa, skianiko knatimgipa, an·sengatako mikrontangchi nkgipa a·gilsakni gamko gitel dakebobilna Jisuko on·aha.

Bimang (Idol) dakani Isolni ra·chakani ong·jana·simang ang *baksana gipin isolrangko daknabe; rupani miterangko, aro sonani miterangko na·simang an·tangtangna daknabe* ” (Re·ongkata 20:23; 20:1; Deuto 5:7; 6:14).

**3. Alcoholism (Churing chupekani):**

Ia chasong gitalo business ka·anio palnangbatgipa bostuara Chuan ong·enga ine agana. An·chingni Meghalaya a·dokoba Governmentni bang·bate tax·mangiparangoni chuan gnigipa ong·a ine saksa Minister angna aganaha. Iako manderang kusi ong·na, katchana, dukrangko gimaatna, saknaanirangko namatna ringanirangko daka. Chu ringahoan mandena poison ong·a, chanchianiko tik ong·atja, out of control ong·ata. Ringipa mandetusidimua mikrake dongna man·ja, name chanchina changja, nikanirang rongtalja (blurred), ka·tongni cha·suako komiata, an·chi ja·dilrangko bilgri ong·ata.

Chu ringipa mandeko nokol ong-ata aro dingtang dingtang a-sel nanganirangko ra-baa. Mande so-otani, Accident ong-ani, drae til-ekani, dakgrik su-griakni, suicide ka-ani, nokdango kajia golmal ong-ani, gaora de-aani, selgija kattarangko aganani (gokani kam), sakgipinko kajia botani, songko nokko so-so jengjeng ong-ata aro ong-siata, oko dongipa bi-sako siata ba sabisiko ong-ata, dedrangni chugniko cha-minoka bon-chotao an-tangko gimaataona sokata. Chu dikdixanasan kusi ong-ani, katchaaniko on-na amaia bonchotaode duknirangkosa ra-baaia. Duk aro saknaaniko dikdixanasan gualataia uan namatade ong-ja, maina peka namahaon duk aro saknaaniko ma-siaia uni gimin chuara namgipa solutionde ong-chongmotja. Chu ringipani gimin sastroo bang-en janapaniko daka, chu mandeko nagande ong-ata, pagla ong-ata, man-e cha-atja, ka-dingstekata, ba-ra suriko ganata, saata, chipu gita suata, namgijako name nikata, brangata, mikron aro ka-tongko rongtalatja, ma-sianiko chel-ata, Jihovani gimin chanchina man-atja, niamko gualata, kaket dakako ra-anga, namgijako ong-ata, gangbingata etc. Chu ringipa an-tangni jangiko gimaata (1 Korinth6:9-10; Gal 5:21; Toe Skia 23:29-33). Chu ringani ba jakalaniara namchongmotja ine Sastroan agana uni gimin ringna nangchongmotja maina ian mamung saloba mandena namgniko ra-bachong-motja.

#### 4. Drug Addiction:

Drug ine aganode A-chikuo sam ine ong-aia iana gipin katta dongja indiba ian an-chingni saa ding-ao samra sanpilna jakalgipa sam bolde ong-skaja (legal medicine or drug), mitam mitam samrangde mandeko pekatna jakalgipasa ong-a (illegal/non medical drug). Drug bostuara, sam bolrangoniko, me-gimurargoniko, matburingrangoniko aro mineralrangoniko tarigipa bostu ong-a. Mitam drug-rangkode dipilokni bigilrangoniko taria (DMT). Ian bisigrakgipa bostu ong-a je Mandeni be-en ning-o dongipa organrangni kam ka-aniko dingtang dakatna (ong-atna) ama. Drug-ko jakale uko watna ba gelna man-gijakon 'drug addiction' ba 'dependance (WHO) ine agana.

##### i. Drug-ko jakalani a-selrang:

Bang-bata manderang ripengska jemangan drug-ko jakale nikmanahachim uamangni draanichi (peer group pressure) drug-ko jakalaniona soka, tom-tomani gri so-so jengjeng ong-gipa janggi tangani obostarangchi, nokdango tom-toma gri (broken family) janggi tanganichi, chonengmitingoni sason gri dedrangko dal-atani a-sel, chonmitingo ia indakgipa bosturangko palramoniko brena watachi, fashion ong-nikachi, ramram man-anirangchi, manderangni nama ga-sua ine tol-naparangchi aro mitamrangara drug mai mancha uako ma-sina ske cha-tote nianichi addict ong-aona soka.

##### ii. Withdrawal symptoms:

Drug addict ong-gimin manderang drug-ko watna namen neng-beani ong-a aro ian ong-na amgijani gita ong-pila. Addict ong-gipa manderangode drug-sa chu-gimik sason ka-a, tangitik dontongahaon ba watahaon drug dongjana a-bachenga unon uamang namen saknabea, be-en dongtoja, be-en moa ba dildila, ging joksrua donga soldi man-ade ong-ja, sasime donga gita daka, mikron mikchi ong-simaia, ku-chi ong-aia (ringrotaia), grengni jorarang chaktogija saknabea. Indake ong-anikon withdrawal symptoms ine minga. Uni gimin addict ong-gimin manderang drugko ringija dongnan man-ja. Ringna nangtelaonan sokata ba obostarangchian draataniko man-a. Drugsrang bang-bataan dam rakgiparang ong-bata aro uko brena tangkarang dongjahaon ong-gijagipa kamrangko ka-na ja-ku de-aona sokatanga jekai cha-ua, ra-seke ra-draa, nokni bosturangko cha-ue pala, togie ra-a etc.

##### iii. Effects of Drug:

Drug-ko jakalgipa manderang minoka, ringa (liquid), gingsika aro biji su-a, indake dakanichi Mandeni gisik aro be-enni bakrangko nosto ong-atna ama. Uasan ong-ja nampilatna man-gijagipa (incurable) sabisirangkoba ra-bana ama. Nitobegipa be-en bimangni bakrangko nosto ka-a, taningko nosto ka-a (brain damage), bikako nosto ka-a (liver damage), kidneyko nosto ka-a (kidney damage), kasopni cancerko ong-ata (lungs cancer), nikaniko tik ong-atja (blurred vision), gualningata (loss memory), ka-tongko nosto ka-a (heart failure), rang-sitaniko tik (normal) ong-atja (respiratory failure), ku-rangko dingtangata *originaloniko* (slurred speech) aro an-chini pressurerko bariata ba komiata dakata tom-tom ong-atja (high or low BP). Uamangni chanchianirangba tik ong-ja (not stable). Saksan donga ku-bososo dakkamaia kusi aro katchaanikon uamangni mikango nikna neng-a. Uamango ka-dongchakna man-ja maina uamang Isolo bebe ra-ja aro toromo ong-ja.

Drug mandena mamung saloba namako ra-bachong-moja. Uni gimin saoba uko jakalna a-bachengode ba jakalengode addict ong-na skangan namatani kamko ka-na nanga uamangko skatang watbrangaina nangjawa ong-jaode ja-man

---

chakdugagen. Ba na-a jakalenga ong-ode addict ong-na skangan Isolo keme bi-e watboha ong-jaode nangko gimaona dilanggen.

## 5. **Tattoo ka-ani:**

Da-ororoni chadamberang tattoo ka-na namnikbea, saniba bimung nitogipa noksa aro indaken misilgipa bimangrangko be-entangtango salanirangan ia somoio fashion ong-tokenga. An-tangni be-eno noksa dakaniara bimang dake olakiamung apsan ong-a. Sawarang tattoo ka-a aro maina ka-a uko uigija saobarangde an-tangni namnikgipa Sports star, Film star, Wrestler, Singer-rang ka-ani gimin ka-paaia. Mark William Calaway (Undertaker) an-tangni jak aro ja-arango kenbegnigipa demon-ni bimangko tattoo ka-aha aro gipin wrestlerang. Mingsingipa Pop singger Madona uni jakpao Hindu toromni **OM** kattako tattoo ka-aha. Da-o chasongni singger Lady Gaga (Stefani Joanne Germanotta) uni kni, ganding chinding, aro ring-na changani gimin mingsingenga ua ming 12 an-tangni be-eno tattoo ka-aha, uni skoni kil-oko (ti-akol) sa-gre saksa, jakasini jakgitoko John Lenon (Antichrist), aro indaken gipin biaprango dingtang bimangrangko. 1969 bilsio Anton Szander Lavey satanic bibleko seaha, uandake Satanic church-ni member sakantian 666 ko uamangni jako tattoo ka-tokaha. Bang-bata tattoo ka-engipa noksarangara satanni noksa, kenbegnigipa bimang aro matburingranga ong-bata uni gimin ia bimangrangni ortoko ma-sichengode nama.

Tattoo-ni a-bachengipa chasongode je manderangan namgijagipa kamo bak dongachim uamangsa tattoo ka-achim jekai, badiaba gang ba groupni manderang, satanko olakigipa, til-ekrakgipa, saniba nokol gamgipa etc. Indakgiparanga tattoo ka-achim, indiba da-o chasongode iakon fashion dake ra-skaengaha. Uni gimin maina tattoo ka-a aro maikai ka-a name ma-sigija skatang tattoo ka-na nangja. Tattoo ka-aniara Isolni namnikgijagipa ong-a *“sigiminrangna na-simangni be-eno nasimang mamung matatanirangko daknabe, aro na-simangni beeno mamung tokarangko daknabe: angan Jihova agana”* (Levi 19: 28; Deuto 14:1), *an-ching Isolni tangipa Torom nokdring ong-a* (1 Korinth 3:16-17; 2 Korinth 6:16).

Tattoo ka-gipa manderang bang-a sabisirangko man-a jekai, hepatitis, herpes simplex virus, HIV, staph, tuberculosis, tetanus aro gipin sabisirangkoba man-enga iasan ong-ja tattoo ka-gipa Mandeni an-chiko gipinrangna on-aba cholija.

## 6. **Pornography:**

Pornography ian Greek katta ***pornographos*** oni ong-baa. ***Pornographos*** ian mingni kattako ra-dime agangipa katta (compound word) ong-a jeni miksongani **“porn”** jeni miksonganian *“be-entangko pale cha-ani”* (prostitute) aro **“graphen”** ni miksongani *“sea jotani”* (to write) til-ek an-chaani aro be-entangko pale cha-ani gimin seani kattarang. Mingipin dake aganode ian me-a me-chik baksa, me-a me-asa baksa aro me-chik me-chikska baksa til-ek an-chaaniko sea jotani, photo ka-achi aro film tariachi manderangna dingtang dingtang kamrangchi mesokani ong-a. Ian da-o a-gilsako businessrangni gisepo tangka man-batsrangipa ong-enga ine agananirang gnanng. Ian manderangni janggi tanganiko ong-siataona sokatenga (sera bera). Chadamberang da-alo ianon sriptokenga bang-bata Internet open ka-giparang Pornography Website-kon kulibatokenga ine sandie nigiparang agana. Iako nigiparang bang-bataan chadamberang bilsio 15-18ni manderang ong-bata ine sandie nianio man-aha.

Iako niahaon mandeko dongdikata, be-enni skanirangko ding-chaororoata, bon-chotao dake niaona sokata. Uni a-selan drae til-ekani, me-chik bi-sarangko kidnape ka-ani, me-asa me-asa baksa til-ekani, me-chik me-chik baksa til-ekani, mande matburingrang baksa til-ekani ia sal somoirango bang-rorobaenga. Ia indakgipa ki-taprang, noksarang, photorang aro movierang manderangko pagla changatokenga. Aganbagimin gita sakgipinni kosako drae til-eka, bia ka-na skangan oko chango dongata, bi-sa galna draata, ma-drang ma-drang baksa til-eka, pagiparang demechikrangko drae til-eka, mande so-taona sokata, ia indakgipa a-selrang da-o an-chingni songo noko ong-engaha. Mandeni chu-sokgnikoba bon-chondikata aro dukko ra-baa. Jik seni gisepo be-enni skaniko chu-sokatani Isolni ra-chakanian ong-a (Aba 2:25; Solomonni Ring-ani). Jik se ong-gija til-ekaniko Isol jegala (Ibri 13:4). Til-eka Isolni mitchiani ong-a (Re-ongkata 20:14; Levi 20:10; Deut 5:18; 22:22; Mt 5:27-28), A-chik sonsari gitaba til-ekaniko ra-chakna man-ja A-chikransan ong-ja Mande jatni dakbewalon ra-chakja, anga ma-sija badiaba jatni dakbewalo ra-chakgenchimode matburingrangni bewalming apsanaigen ine anga an-tangde chanchia. Sodom aro Gomorah ia indakgipa papni a-selan nisiatako man-aha. Moseni niamoba tilekgipa mandeko ro-ong gotatgrime siata (Jh 8:5; Deut 22:20-21; Levi 21:9).

- Til-eke janggi tangipa Isolni patianiko man-jawa.
- Manderangni mande ra-ako aro de-mitelaniko man-jawa.

- A-gilsako kusi aro katchaani gri janggi tanggen.
- Isol an-tangni manderangko rongtale janggi tanganiko nangnika *I be holy, for I Am Holy* ( Lev 11:44-45; 19:2; 20:26; 1 Pitor 1:15-16)

## 7. **Abortion:**

Abortion ian mande a-gilsako atchina skangan ma-ani oko ong-mitingon atchignigipa bi-sako atchina on-gijaso-ote galani ong-a. Ian aiao inmanpil-gipa ka-saningijani, Mandeni aro Isolni ra-chakna amgijani ong-a. Maini gimin manderang abortionko dakenga? Maina ia indakgipa kamrangko ka-na draatenga? Una agre dingtang dingtang sing-anirang an-chingona sokbaa.

Ian chadambemiting somoio be-eni skaniko chu-sokatani a-sel ong-enga, saobade mahari mahari baksa til-ek an-chaanichi ong-enga, saobara jik seni kosako sakgipin mande baksa be-enni nangrimanirang dongani a-sel ong-enga indaken gipin a-selrang. Abortion ka-aniara mande so-ota ong-a aro mande so-otaniko Isol raken beng-a (Re-ongkata 20:13; 21:12; Mati 19:18; Aba 9:5).Isolde ma-ani ok ba satipkode an-o dongengipa bi-sanade salgi gitasa ong-atachim, jeon pilakni gitan naljokani donga. Indiba mande so-otchakram biap dakskaengaha. Aiao mairongpile misilani, Isol iana Kusi ong-ja.

## 8. **Ganding Chinding:**

Chadamberang nitoe ganna china namnikgiparang ong-a. Gital gital design and fashionrangko ja-rikna ska, mingsingipa Mandeni gana chinani aro an-tangni namnikgipa film actor-rangni gananiko chadamberang ja-rikpana ska, indiba na-a saksa Christian chadambe ong-e maidakgipa gananirangko ganna nanga uako uie ra-ode nama.

- Olakianirango maidakgipa gananirangko ganna nanga uakoba ma-sie ra-ode nama. Skangni sal somoirangode nambatgipa aro kragipa ganding chindingrangko Giljaona ganbaronga. Da-oni chadamberangde bajarchi ba club ba partychi re-na namnikbea aro gital gital fashion-ni chola ba-ra gananirangko gana aro uarangkon olakianirangonaba ganbaskaenga.Me-chikrang, tight ong-gipa be-en apsanchrak nikaigipa chola, skirt kan-dika asongtoja, ka-bak nikaigipa gananirang,indakarangko ganenga apsandake me-asarangba jakpongko nimate, ka-bakko watbrange, long pant bel-oke gananirangko gana ian tom-aniona re-bagipangni sepango atchongengipa mandena dongdikaniko ra-baa aro tom-aniko dilengipa aro sastro skigipa manderangko namen man-dikata ba uncomfortable ong-ata.
- Cholao dingtang dingtang noksa gnangiparangko ganani, uigija skatang noksa sila nikana ganaina nangja.
  - Cholao sapau konika ian til-ek an-chagiparangni noksa ong-a.
  - Sigimin manderangni skorang ian satanko mesoka.
  - Mingsingipa manderangni noksa jemangan Sastanko olakia.
  - Uigijagipa kattarangchi seanirang jerangan satanko de-mitelgipa kattarang.
- Jeans rangko Christianrang ganna nangja aro olakianirangode gansrangnan nangja uamangde norokchi re-angtokaigen ine skisretgiparangba dongbea,iana angni mingsa sing-ani indide Western Countryni manderangde norokchirarasa ong-ainokde? Maina uamangde gimikan ong-na sipile Pamong aro gipinrangba gantokaia.
- Mingsa sastroni bakme-asa me-chikni aro me-chik me-asani gana chinaniko ganna nangja (Deuto 22:5), iaSastroni bakko ra-enba manderang namen skisretbea mongsongbate me-asarang. Me-chikrang longpant ganna nangja ian me-sarangnisaine akanganirang donga indiba mingsako uibo longpant (formal & jeans) koba me-chikna ine tariani donga iade me-chikrangnian ong-a, ong-jaode me-asanisa inode me-asarang ganskabo. Me-chikrangba mingsako ma-siskabo me-asarangni ganani ine tarigipakode ganskanabe maina iade purely me-asani gananisa ong-a. Iako na-simang ganode krajava aro manderangba ra-chakna man-jawa.
- Me-chikrang mongsongbate an-tangtangna je gananian kraachim uko name ma-siode nambata gimik me-chikni ganani nangna krajanaba donga. Ramgipa mandena kragipa gananiko milgipa mande ganode basakobade nidikani ong-a, apsandake ramgipa milgipani cholarangko ganode unoba nidiskagen etc. Jedakgipa chola barako ganbo rongtala kraanio ong-na nanga, gana chinachiba iako patigipa Isolko rasong on-a ama. An-chingni gana chinanirangko manderangna mesokani pal an-chingni ka-tongo ong-gipa Gitel Jisu Kristokosa niksengatna ba mesokna nanga.
- Mande jedakgipa gana chinaniko gana uachian an-tangni chong-motgipa characterko sakgipinna paraka ine agana.

---

Isol an-tangan mandeko ganat chinataha (Aba 3:21), me-asa me-chikni aro me-chik me-asani gana chinaniko ganna nangja (Deuto 22:5), Pilako dakon Isolni rasonguna dakna nanga (1Korinth 10:31), Isolni namnikani gita tariani gana chinani ong-china (1 Pitor 3:3-5).

## 9. Choosing a Partner for Life:

Chadamberang changsaode jikgipa segipa ra-e nokdang dakna gisiktangtangode chanchisamsoanirang donga. Ian nama indiba iana chadamberang simsakbena nanga maina ian rakbegipa kamba ong-a. Maibakai seoksretaha ong-ode ian janggi tanga gimik skimani ong-gen, na-a maikoba bajaroniko breode aro na-a uko namnikja ong-ode bodolna (change) ka-na man-gen indiba jik aro sekode indake dakna man-ja, uni gimin maidakgipa mandeko seokode an-tangna, nokdangna, jatna, mondolina, patianiko ra-bagipa ong-gen indakgipa mandeko seokna nanga.

- Me-asarang an-tangna jora ripengko sadiengon adita singanirangko dakode namgen, *Ia me-chikara angna ka-sagenma? Ua namgipa ma-gipa ong-genma? Isolko ma-sigipama? etc.*
- Me-chikrangba adita nianirangko dakna nangchongmota jekai, *Jikna ka-sagipa mande ong-genma? Cha-anirangko chu-onga gita nokdangna aldu mitangipa on-genma? Jako maiba kamrang dongama ba dongjaoba jaktangchi kamaina man-genma? Ka-singipa aro chakchikna amgipama? Uni chanchianirangara rongrikkipama? Isolko uigipama etc.*

## 10. Bon-atani:

Ia chasong namen namjabegipa ong-aha tom-tomgijani, togia cha-bokani, rasekani, mite dakani, churing chupekani, til-ekani, indakarangchi jajaanian pilakchin gapaha ia indakgipa somoio na-a saksa chadambe ong-e an-tangni chadambe ong-aniko gamchate ra-e janggi tangna nanga. Maikai ong-na amgen ine agananirang ba jajrenganirang dongengama? Iako mandearichi man-jawa, Isol gri ba Isol baksa nangrimani dongjaode, indiba Isolo pangchake bi-achi, Isolni kattarangko poraie madidate ka-achi aro mikosto ka-anirangchi, kamtango kaket ong-achi, nama kamrangchi an-tangko jakchakatgijanichi, nama ripengrangko basee uamang baksa rorongachi, Isolna kene janggi tangachi chena gita man-gen. Na-a ia a-gilsako jegitaba janggi tangnade man-aigen Isolde nang-kode drajawa indiba Sastro-o maiko agana (Aganprakgipa 11:9-12:1). Na-a jegita seng-gipa sapgipa bilak wa-sagipa ong-genchimoba Isol gri mamung dakeba ia ong-sigipa chasongko chena gita amjawa. Isolna kenbo Uko manibo Ua nang-na cheaniko aro patianiko on-gen.